



Offo ex regio sanguine Anglosaxonum prognatus, qui prius Britanniam occuparant, Christianus factus, in Germaniam profectus est, ut homines ad Christum perduceret, & ad uitæ innocentiam suo exemplo prouocaret. Itaq; secundum Rhenum ascendens in Brisgauriam peruenit, atque suis uirtutibus effecit, ut magnam auctoritatem apud Austrasiæ reges acquisierit, qui etiam ipsum ibidem dominum constituerunt. Ergo Offo ad Kintzgam fluum arcem condidit, atque Offonisburgum uocauit. Id postmodum in oppidum Imperiale commutatum. Miliare ab eo loco Monasterium Schutteren fundauit, ut in eo loco tanquam celeberrima schola Christianorum iuuentus institueretur, quo commodius postea Ecclesias instituere, & rebus præesse possent. Sic uir ille pietate & sanctitate illustris, eam partem Germaniæ excoluit, atque moriens magnum desiderium sui reliquit.